

Toetrede

Liturgie van die Lig

Aansteek van die kerse

Lied 284

Laat, Heer, u vrede deur my vloei...
waar haat is, laat ek daar u liefde bring.
Laat ek in pyn en smart vertroostend wees
en krag gee deur geloof in U, o Heer.

Refrein (slegs na strofes 1 en 2)
O Heer, help my om altyd so te leef –
om ander hoër as myself te ag,
ja, om lief te hê – ander bo myself –
en ook eerder te gee as te verwag.

Laat, Heer, u vrede deur my vloei...
en laat ek hoop gee waar daar twyfel is.
Ek wil u lig in duisternis laat skyn.
Laat ware vreugde altyd uit my straal.

Laat, Heer, u vrede deur my vloei...
leer my om ook soos U te kan vergeef.
Maak my bereid om aan myself te sterf,
dat ander U al meer in my kan sien.

Woorddiens

Tema: Goeie Vrydag

Skriflesing: Lukas 23:1-56 (1953)

¹ EN die hele menigte van hulle het opgestaan en Hom na Pilatus gelei.

² En hulle het Hom begin beskuldig en sê: Ons het gevind dat hierdie man die volk verlei en verbied om aan die keiser belasting te betaal, terwyl Hy sê dat Hy self Christus, die Koning, is.

³ Toe vra Pilatus Hom en sê: Is U die Koning van die Jode? En Hy antwoord hom en sê: U sê dit.

⁴ En Pilatus sê vir die owerpriesters en die skare: Ek vind geen skuld in hierdie man nie.

⁵ Maar hulle het aangehou en gesê: Hy maak die volk oproerig met sy leer die hele Judéa deur, vandat Hy in Galiléa begin het tot hiertoe.

⁶ En toe Pilatus van Galiléa hoor, vra hy of die man 'n Galiléër is.

⁷ En nadat hy verneem het dat Hy uit die magsgebied van Herodes was, stuur hy Hom na Herodes wat self ook in daardie dae in Jerusalem was.

⁸ En toe Herodes Jesus sien, was hy baie bly, want hy was al geruime tyd begerig om Hom te sien, omdat hy veel van Hom gehoor het; en hy het gehoop om een of ander teken te sien wat deur Hom gedoen sou word.

⁹ En hy het Hom met baie woorde uitgevra, maar Hy het hom niks geantwoord nie.

¹⁰ En die owerpriesters en die skrifgeleerdes het Hom heftig staan en beskuldig.

¹¹ En nadat Herodes saam met sy soldate Hom met veragting behandel en bespot het, werp hy Hom 'n blink kleed om en stuur Hom terug na Pilatus.

¹² En Pilatus en Herodes het op daardie dag goeie vriende geword, want hulle was vantevore in vyandskap teenoor mekaar.

¹³ Toe roep Pilatus die owerpriesters en die owerstes en die volk bymekaar en sê vir hulle:

¹⁴ Julle het hierdie man na my gebring as een wat die volk afvallig maak. En nou het ek in julle teenwoordigheid ondersoek ingestel en in hierdie man geen skuld gevind aan die dinge waarvan julle Hom beskuldig nie;

¹⁵ ja, ook Herodes nie, want ek het julle na hom gestuur; en daar is deur Hom niks gedoen wat die dood verdien nie.

¹⁶ Nadat ek Hom dan gekasty het, sal ek Hom loslaat.

¹⁷ En hy was verplig om vir hulle op die fees een los te laat.

¹⁸ Maar die hele menigte skreeu en sê: Weg met Hom, en laat vir ons Barábbas los!

¹⁹ Dié was oor 'n sekere opstand wat in die stad plaasgevind het, en oor 'n moord in die gevangenis gewerp.

²⁰ Daarop spreek Pilatus hulle weer toe, omdat hy Jesus wou loslaat;

²¹ maar hulle het aangehou roep en sê: Kruisig, kruisig Hom!

²² En vir die derde keer sê hy vir hulle: Watter kwaad het Hy dan gedoen? Ek het in Hom niks gevind wat die dood verdien nie. Ek sal Hom dan kasty en loslaat.

²³ Maar hulle het aangehou met 'n harde geroep en geëis dat Hy gekruisig moes word; en hulle geroep en dié van die owerpriesters het die oorhand gekry.

²⁴ Toe gee Pilatus uitspraak dat aan hulle eis voldoen moet word.

²⁵ En hy het die een vir hulle losgelaat wat oor opstand en moord in die gevangenis gewerp was, die een wat hulle geëis het. Maar Jesus het hy aan hulle wil oorgelewer.

²⁶ EN toe hulle Hom weglei, neem hulle 'n sekere Simon van Ciréne wat van die veld af gekom het, en sit die kruis op hom om dit agter Jesus aan te dra.

²⁷ En 'n groot menigte van die volk het Hom gevolg, en vroue wat rou bedryf en Hom beklag het.

²⁸ Maar Jesus het Hom omgedraai en vir hulle gesê: Dogters van Jerusalem, moenie oor My ween nie, maar ween oor julleself en oor julle kinders;

²⁹ want daar kom dae waarin hulle sal sê: Gelukkig is die onvrugbares en die moederskote wat nie gebaar en die borste wat nie gesoog het nie.

³⁰ Dan sal hulle vir die berge begin sê: Val op ons! en vir die heuwels: Bedek ons!

³¹ Want as hulle dit doen aan die groen hout, wat sal met die droë gebeur!

³² En daar is nog twee ander, kwaaddoeners, weggelei om saam met Hom tereggestel te word.

³³ EN toe hulle op die plek kom wat Hoofskedel genoem word, het hulle Hom daar gekruisig, en die kwaaddoeners, een aan die regter- en een aan die linkerkant.

³⁴ En Jesus sê: Vader, vergeef hulle, want hulle weet nie wat hulle doen nie. En hulle het sy klere verdeel en die lot daarvoor gewerp.

³⁵ En die volk het dit staan en aanskou. En die owerstes het saam met hulle ook geskimp en gesê: Ander het Hy verlos; laat

Hy Homself verlos as Hy die Christus, die uitverkorene van God, is.

³⁶ En die soldate het Hom ook bespot en gekom en vir Hom asyn gebring

³⁷ en gesê: As U die Koning van die Jode is, verlos Uself.

³⁸ En daar was ook 'n opskrif bokant Hom geskrywe in Griekse en Romeinse en Hebreeuse letters: HY IS DIE KONING VAN DIE JODE.

³⁹ En een van die kwaaddoeners wat opgehang is, het Hom gesmaad en gesê: As U die Christus is, verlos Uself en ons.

⁴⁰ Maar die ander een antwoord en bestraf hom en sê: Vrees jy ook God nie, terwyl jy in dieselfde oordeel is? —

⁴¹ ons tog regverdiglik, want ons ontvang die verdiende loon vir ons dade, maar Hy het niks verkeerd gedoen nie.

⁴² En hy sê vir Jesus: Dink aan my, Here, wanneer U in u koninkryk kom.

⁴³ En Jesus antwoord hom: Voorwaar Ek sê vir jou, vandag sal jy saam met My in die Paradys wees.

⁴⁴ En dit was omtrent die sesde uur, en daar het duisternis oor die hele aarde gekom tot die negende uur toe;

⁴⁵ en die son is verduister; en die voorhangsel van die tempel het middeldeur geskeur.

⁴⁶ En Jesus het met 'n groot stem uitgeroep en gesê: Vader, in u hande gee Ek my gees oor! En toe Hy dit gesê het, blaas Hy die laaste asem uit.

⁴⁷ En toe die hoofman oor honderd sien wat daar gebeur, het hy God verheerlik en gesê: Waarlik, hierdie man was regverdig.

⁴⁸ En die hele skare wat vir hierdie skouspel bymekaar was, het op hulle borste geslaan toe hulle sien wat gebeur het, en hulle het teruggegaan.

⁴⁹ En al sy bekendes het ver weg gestaan; ook die vroue wat Hom van Galiléa gevolg het, het hierdie dinge gesien.

⁵⁰ EN daar was 'n man met die naam van Josef, 'n lid van die Raad, 'n goeie en regverdige man

⁵¹ — hy het nie met hulle raad en handelwyse saamgestem nie — van Arimathéa, 'n stad van die Jode, wat ook self die koninkryk van God verwag het.

⁵² Hy het na Pilatus gegaan en die liggaam van Jesus gevra

⁵³ en dit afgehaal en in linne toegedraai en dit neergelê in 'n graf wat uit 'n rots gekap was, waar nog nooit iemand in gelê het nie.

⁵⁴ En dit was die dag van voorbereiding, en die sabbat wou aanbreek.

⁵⁵ En die vroue wat saam met Hom van Galiléa gekom het, het ook gevolg en die graf gesien en hoe sy liggaam neergelê was.

⁵⁶ Daarop het hulle teruggegaan en speserye en salf berei en op die sabbat gerus volgens die gebod.

Broodjies vir die pad

Were you there

Were you there when they crucified my Lord?
Oh, were you there when they crucified my Lord?
(Oh, sometimes it causes me to tremble) tremble
Were you there when they crucified my Lord?

Were you there when they nailed him to the cross?
Were you there when they nailed him to the cross?
(Oh, sometimes it causes me to tremble) tremble
Were you there when they nailed him to the cross?

(Were you there when they laid him in the tomb?
Were you there when they laid him in the tomb?
Oh, sometimes it causes me to tremble) tremble
Were you there when they laid him in the tomb?

Well, were you there when the stone was rolled away?
Were you there when the stone was rolled away?
(Oh, sometimes it causes me to tremble) tremble
Were you there when the stone was rolled away?

Kerk sonder 'n kruis

So sit ek, Wynruit en kinders Vrydagoggend in die Kerk en luister na die boodskap van die kruisiging van Christus.

Dit tref my toe skielik wat dit was wat ek nie gesien het nie, maar tog oral gesien het. Laat ek verduidelik.

Twee weke gelde sluip ek en Wynruit te voet deur die agterstraatjies (wat te nou is vir toerbusse) van Edirnekapi, 'n distrik aan die westekant van Istanbul. Ons is op pad na die Chora Kerk (Karyi) wat beteken "landelik".

Hierdie kerk is aanvanklik gebou in die 4de eeu buite die stadsmure van Konstantinopel en gedurende 1315 tot 1321 het Theodore Metochites, 'n Bisantynse Staatsman, die kerk onder hande geneem en die mooiste frescoes en mosaikwerk in die kerk aangebring. Na die Ottoman inval, is die kerk in 'n moskee omskep en die kunswerke is toegepleister.

Gedurende 1948 is die kerk gerestoureer en onder die pleisterwerk het die kunswerke weer na vore gekom en is die kerk as museum verklaar.

Die kunswerke konsentreer hoofsaaklik op die lewe van Maria, moeder van Christus, die tyding van die maagdelike geboorte, die geboorte van Jesus en dan Sy lewe met spesifieke verwysings na die gelykenisse en wonderwerke.

Daar is ook verskeie uitbeeldings van nakend en lydende siele.

Dan is daar ook kunswerke wat verwys na die opstanding van Jesus, met Jesus wat op die troon sit en Johannes die Doper wat Hom om vergifenis vra vir die sonde van die mensdom.

Alhoewel die lewe van Maria en Christus deur die kunswerke weergegee word, was daar wel hierdie een mosaikwerk in die kerk wat nie Bybels akuraat is nie, maar tog geimpliseerd is en wat baie raar is.

Dit is Maria op haar sterfbed met Jesus wat 'n baba vashou. Die simboliek van die baba is Maria se siel wat Hy in ontvangs neem. Hy het ook vir sy ma gesterf.

Vrydag, toe ek in die kerk sit, tref dit my toe wat dit was wat ek nie in die Chora Kerk gesien het nie. Daar was nie 'n kruis met 'n lydende figuur nie. Daar was nie bloed wat dramaties uit wonde uit gedrup het nie of wanhopige hande wat uitgestrek het na die kruis nie. In daardie kerk met gedetailleerde weergawes van Jesus se lewe, was daar nerens enige verwysings na Sy lyding of kruisiging nie.

Dit was asof die lyding en vernedering van Christus so heilig was en met sulke groot deernis en respek beskou is, dat dit nie uitgebeeld kon word nie.

Roosmaryn

<http://blogs.litnet.co.za/eros01/2012/04/09/kerk-sonder-n-kruis/>

Lied 526

Waar daar liefde is, en deernis,
waar daar liefde is, daar is God die Heer.
Ubi caritas, et amor
ubi caritas, Deus ibi est.